

LATGALIŠU GAZETA

Latgolys Radeja otkon pider latgališim

Kū vaira volūdu, tū lobuok!

LaKuGa.LV



Koč i gavieņa laikā, tak 19. martā – iz Jezupa dinys – latgališim ir atļauts izvest tai paskajuok, deļ tam itei dīna beja podlaseita, kab Reigā Kongresu nomā sareikuotum latgališu muzykantu lobdareibys koncertu četrū stuņžu garumā latgaliskys Latgolys Radejys atjaunynuošonai. Kūpā saguojuši ļauds sazidova gondreiz 2000 latu. Piec puors dīnu ari tyka zynoms, ka goda suokumā nūtykušais Latgolys Radejys pierkšonys darejums beidzūt atzeits par nalykumeigu.

Jureits
Kab aplīcynuotu latgaliskys "Latgolys Radejys" napīcīšameibu, Reigys koncertā pīsadaleja daudzēji latgališu muzykanti: "Bez PVN", "Crust", "Daba-su durovys", "Dzyga", "Green Novice", "Latgolys dāmu pops", "Likteneigais pagrižis iz Vainovu", "Maskačkys spīelmani", Bīruta Ūzuleņa, "Patrioti.lg", "Peec lietus", "Restauratori", "Grodī". Juoatzeimej, ka vysī muzykanti pīkryta pīsadaleit koncertā bez mozuoki, ari sovus uzaturiešonys i ceļa izdevumus jī sedze poši.

Koč pyrms pasuokuma jau beja izziņuots, ka īso-kamais zīduojuma lelums ir 5 lati nu cylvāka, tak ari mozuoki zīduotuoji natyka dzeiti pa celi, deļ tam Reigys Kongresu noma lelais zals beja, tai saceit, "bez 5 minotu" pylns.

Pi īišonys durovu, tyka

saorganizāts ari nalels tierdzenš ar latgališu muzykys īrokstīm, kai ari gribietuoji varieja iz vītys izastuot bīdreibā "LR", kas par sovū golvonū aizdavumu ir izvīziejuse latgaliskys "Latgolys Radejys" atjaunynuošonu, partū ari beja golvonuo lobdareibys koncerta organizatore. Papyldinformaceja ap itū sabīdriskū organizaceji atrūnama puorstaipteiklā: <http://lr.lv/>

Juoatzeimej, ka bīdreibys "LR" vaļde (Aņss Ataols Bierzenš, Agris Bītāns, Anna Rancāne, Gun-tis Rasims i Imants Slišāns) izsoka pateiceibu Latgolys regionalajim laikrokstīm "Latgales Laiks", "Ezerzeme", "Ludzas Zeme", "Novadnieks", "Rēzeknes Vēstis" i "Vaduguns", kas vīnotai atsasaceja pi sevi izvītuot nalykumeigai retranslejamuos radejys reklamu.

Bīdreibys "LR" vaļdis

Kai pyrmi skaļai koncertu suoce grupa "Green Novice".



"Dzyga" nu Rēzeknis pusis nūpeļneja vysskaļuokūs aplausus.

pīrīksādātuos A.A.Bierzenš "Latgališu Gazetai" pastuosteja, ka pyrmi dīņ (23. martā) tyka apmīrynuota SIA "MG Latgolas Bolss" ("Latgolys radeja") praseiba goda suokumā nūtykušū darejumu atzeit par nalykumeigu. Niu radejys mozuokuma dalinīkim ir tiseibys atpiekrt 75% sabīdreibys daļu par īpīrīk nūsaceitū cenu – 66 tyukstušom latu. Radejys darbeibys nūdrūšynuošonai ir planavuots isaisteit vaira ļaužu, tai tiks garantāts, ka iz pīrīku radeja byus eistyna tautys radeja i nabyus atkareiga nu kaida dalinīka vīnpersoniskys darbeibys.

Niule nūteik dorbi pi latgaliskys "Latgolys Rade-

jis" īspiejami dreīžuokys atjaunynuošonys i jau tyvuokajuos dīnuos planavuots atsuoct raideišonu īpīrīškejuos frekvenčejuos Rēzeknē, Daugavpīlī, Jā-kubpīlī i Bolvūs.

Bīdreiba "LR" izsoka pateiceibu vysim Reigys latgališim i latgališu volūdys atbaļsteituojim, kas pīsadaleja Jezupa dīnys lobdareibys koncertā voi cytaiž atbaļsteja Latgolys Radejys atjaunynuošonys akcejis! Teik planavuots, ka piec gavieņa i Leldīņu tiks turpynuoti latgališu muzykys labdareibys koncerti ari vysūs leluokajūs Latgolys mīstūs: Preiļūs, Rēzeknē, Ludzā, Bolvūs, Kruoslovā, Daugavpīlī i Krystpīlī.

NŪTIKŠONU KALEŅDERS

- Skotuvys runys konkurss "Vuolyudzāni" 25.04.2009 09:00, Rēzeknis 1. v-školā, Dziernovu 3a.

Konkursa mierkis:

- Īpazeit nūvoda literaturu i folkloru
- Izkūpt latgališu rokstu volūdu
- Nūvietēt konkursantu prasmi atkluot daiļdorba nūskaņu

Konkursa nūrise:

- Konkurss nūteik pa vacuma grupom: pyrmškola, 1.-4., 5.-8., 9.-12., studenti.
- Kotrs konkursa daleibnīks sagatavo 2 daiļdorbu fragmentus latgaliski (vīnam daiļdorbam juobyut nu F. Trasu-na voi M. Andžānis daiļradis).
- 1. konkursa kuortā kotrs daleibnīks runoj pyrmū prozys voi dzejis fragmentu, bet 2. kuortā – ūtrū sagatavuoitū prozys voi dzejis fragmentu.
- Kotra literaruo dorba lasiejuma ilgums nadreikst puorsnēgt 3 min.

Konkursa nūtikšonys laiks i vīta:

- Konkurss nūteik 2009. goda 25. apreli Rēzeknis 1. v-školā, Dziernovu 3a.
- Suokums plkst. 10.00. Daleibnīku registraceja nu plkst. 9.00-9.50.
- Pīteikumus syuteit iz LVLKŠA leidz 23. apreļam iz e-postu: lvksa@inbox.lv, nūruodūt školāna vuorda, uzvuordu, školū, klasi, školuoituoju i daiļdorba autoru, nūsaukumu.

- Latgališu volūdys i kulturviesturis Olimpiade vydsškolanim 25.04.2009 10:00, Rēzeknis 1. vydsškola, Dziernovu ilā 3a

Mierkis i aizdavumi:

- Školu jaunuotnis vydā popularizēt latgališu kulturys montuojumu.
- Rūsynuot školānu interesi par latgališu volūdu i kulturviesturi.
- Veicynuot kulturys vierteibu i izcyloukūs nūvadnīku apzynyuošonu školuos.

Olimpiadē pīsadola vydsškolys komanda 3-5 vydsškolanu sastuovā. Olimpiadis aizdavumus komanda veic kolektīvi, aizdavumi ir mutiski i rakstiski.

Komandys olimpiadei pīsaceit da 21. apreļa Latgališu volūdys, literaturys i kulturviesturis školuoituoju asociacejai pa e-postu: lvksa@inbox.lv

Olimpiadis aizdavumu temys:

- Latgališu rokstu volūdys viesture
- Marijai Andžānei – 100
- Frančam Trasunam – 145
- Tests par Latgolys kulturys vaicuojumim (myusu dīnu latgaliskuos aktivitatis, nūtykumi, jubilejis)

Jaunīšu rodūšūs dorbu konkurss par Latgolu

leidz 10.04.2009, kab sekmeitu jaunīšu interesi par Latgolys kulturviesturi i niule-

nejū dzeivi, bīdreiba "Latgolys Studentu centrs" izsludnoj jaunīšu rodūšūs dorbu konkursu par Latgolu.

Konkursam ir divejis dalis: eseju konkurss i vizualūs dorbu konkurss.

Konkursā var pīsadaleit jaunīši: pamatškoļnīki, vydsškoļnīki i studenti vacumā da 25 godu. Dorbus var īs-

nigt latvīšu i latgališu rokstu volūduos.

Rodūšūs dorbus syuteit bīdreibys "Latgolys Studentu centrs" Reigys birojam, Antonijas ielā 8-3/6, Rīga, LV – 1010 ar nūruodi "Rodūšūs dorbu konkurss" da 2009. gods 10. apreļa (posta zeidmūgs, syūtūt pa postu) voi iz e-postu: lgsc@inbox.lv.

Vaira informacejis i rodūšūs dorbu konkursa nūlykums: LaKuGa.LV.

"Latgališu Gazeta" atbolsta Latgolys regiona atteisteibys agentura i Kulturkapitāla fonds.

